



Atorfinni toqqaannartumik pisortat suliariumannittussarsiuussineranni suliassanik agguaanernik kiisalu isumalluutininik atuinissamik akuersissutinik agguaassinernik suliaqarfiusuni immikkut tatigisaallutik atorfilinnik nutaamik atorfinitsitsinermut atatillugu atorfinitsitsinermi piunasaqaatinik atulersitsinerup pitsaaqutaanik pitsaanngequtaanillu qulaajaaviusumik kingusinnerpaamik UKA2021-mi Naalakkersuisut nassuiaasiornissaat pillugu Inatsisartut aalajannngiffigisasasattut siunnersuut. Nassuiaammi minnerpaamik pissutsit ilanngussa q 1-mi taaneqartut qulaajaavigineqassapput.

(Medlem af Inatsisartut Múte Bourup Egede, Inuit Ataqatigiit)
(siullermeerneqarnera)

Inatsisartunut ilaasortamut Múte Bourup Egede-mut (IA) qujanaq siunnersuuteqarninnut.

Demokraatit tunngaviulluinnartumik suliffeqarneq killilersorneqarani nikerartuq isumaqatigaa, suliffeqarfiit sulisunik pitsaanerpaanik pissarsiniarlutik unammillerfigisinnaasaat. Tamanna iliuuseq peqqinnartuuvog, sulisitsisut suliffiup pitsaasuunissaanik sulisullu pitsaasumik atugaqarnissaannik eqqarsarnissamik "pinngitsaalissammatigit", taakku allamik suliffittaqqunagit.

Siunnersuuteqartoq siunnersuuteqarpoq nassuiaasiornissamik sanasoqassasoq, tassani pitsaaqutaanik pitsaanngequtaanillu qulaajaaviussalluni immikkut tatigisaallutik atorfilinnik nutaamik atorfinitsitinermit atatillugu atorfinni toqqaannartumik pisortat suliariumannittussarsiuussineranni suliassanik agguaanernik aammalu isumalluutininik atuinissamik akuersissutinik agguaassinernik suliaqarfiusuni.

Demokraatit siunnersuut isumaqatigisinnaanngilaat. Siullermik ullumikkut imaareerpoq, atorfillit immikkut tatigisaallutik atorfeqartut atorfinitsitaanermi immikkut piunaffigineqartarmata. Immikkut piunasaqaatit, sulisut pineqartut qaffasinnerusumik akissarsiaqartinneqarnerannut tunngaviusumik. Nutaanik atorfinitsitsineri immikkut piunasaqaatinik tamanut atuuttussanik eqqussissagutta, pisortat ingerlataanni immikkut tatigisaallutik sulisorisat akissarsiaasa annertuutik malunnaatilimmik qaffanneqarnerannik kinguneqassaaq. Tamannalu uagut naleqqussorinngilarput.

Taakku saniatigut pingaartuuvog tikkuassallugu, Kalaallit Nunaanni sulisinnaasut annikimmata. Atorfinitsitaanermi piunasaqaasiussagaluarutta, sulisinnaasut ikiligaluttuinnassapput, naggataatigullu avataanit sulisussarsiorinissamut pisariaqartitsineq qaffassalluni.

Soorlu oqartugut, suliffeqarnerup killilersorneqarani nikerartuunissaa isumaqatigaarput. Atorfinitsitsinermi immikkut piunasaqaasiussagutta tamanna aporfingussaaq.

Naggataatigullu uparuarusunnarpoq, pisortani atorfeqartut nipangiussisussaataanermik malittarisassaat suliunnaareernermi aamma atuummata.



Taamatut oqaaseqarluta siunnersuutip itigartinneqarnissaa innersuussutigaarput.